

Yunis

Peyğəmbəri kitob

Vəsə

«Yunisi» kitob bəhs kardeydə bə Xıdo əmri tabe be nıpiyə Yunis peyğəmbəri sə omə ğəziyonku. Xıdo hamyəşbe bəy, bışu bə mohtəşəmə Aşşuri podşoəti poytaxtə şəhr Ninevə. Bə zəmonədə Aşşur qırd deşmenbe de İsraili. Əve Yunisi piyeydəşnıbe Xıdo sıxani bırosnı bə vəyo bıəkəson. Çumçıko əv əminbe bə Xıdo rəhmin be. Zıneydəbe ki, Xıdo ğır nıbəkarde Ninevəviyon, qirəm əvon tobə bıkon. İ-dıqlə hodisə be bəpeştə, mılxəs, məcburiyəti vədə mandə Yunisi itoət kardışe bə Xıdo. Yunis vey ğıyzin beydəbe, çəy peyğəmbərəti bə vırə nırəseədə, Xıdo isə doşe bəy pandənomə. Çı kitobo oşko çiyeydə ki, Xıdo piyeydəşe bıbaxşı iyən peroxnı əncəx İsraili xəlği ne, həmə bəşəriyyəti.

Kitobi məzmun:

- 1: 1-17 Yunisi hele iyən çəy beitoətəti
- 2: 1-10 Yunisi tobə iyən xılos
- 3: 1-10 Yunis şeydə bə Ninevə
- 4: 1-11 Yunisi ğıyz iyən çe Xıdo lutf.

1

Yunisi hele iyən çəy beitoətəti

¹ Rəbbi sıxan nozil be bə Amittayi zoə Yunisi: ² «Bəşt, bışi bə Ninevə - bə yolə şəhr iyən car bıkəş bəçəy vəynə, çumçıko omə detobə Bəmı rəsə vəyo bıəkəson bevəci». ³ Əmma Yunis əşte ki, bıvıtı Rəbbi huzuro bə Tarşiş. Əv dəro qınıye bə liman Yafo, pəydo kardışe əyo şə qıləy qəmi doşe çəy ropul, penište bə qəmi ki, deəy bışu bə Tarşiş.

⁴ Əmma Rəbbi rost kardışe dıyo dimisə zumandə vavaz, bərkə kulok bino be dıyoədə, kam mande pıtıpoə bıbu qəmi.

⁵ Qəmivonon dəşin bə tars, har kəsi sədo kardışe ıştə xıdo iyən qəmi sıvık bibu votəynə şodoşone bə dıyo əyo bıə şəlon. Yunis isə eşəbe bə qəmi jinə hissə, olxartəbe, bərk şəbe bə han. ⁶ Qəmi rəis oməy çəy tonə, votışe: «Tı çiçe hitəş? Bəşt, sədo bıke ıştə Xıdo. Ğavər ıştı xıdo bə yod dənə əməni iyən əmə məhv əbınimon».

⁷ Qəmivonon votışone bəyəndı: «Boən pışk şodəmon, bunəmon ın bəlo bə çı səbəb bəçəmə sə oməy?» Şodoşone pışk, pışk eqıniye bə Yunisi. ⁸ Bəvədə parsəyn Yunisiku: «Bıvot bəmə, bəçəmə sə omə ın bəlo çiki hıubətəy? İştı sənət çiçe? Çıkonco omeydəş? Vətəni kovrəye? Kom xəlğəş?» ⁹ Yunisi cəvob doşe: «Az İbranim.

Tarseydəm dıyo iyən zəmini ofəyə kardə osmonon Xıdo Rəbbiku».

¹⁰ Əvon bərk tarsəyn iyən votışone: «Tı ımı boçi karde?» Çumçıko zıneydəbin Yunisi Rəbbiku diyəro beyro vite, ıştən nəql kardəşbe ım bəvon. ¹¹ Dıyo şe-şe həniyən xuruş kardeyro əvon parsəyn Yunisiku: «Çiç bıke mon detı ki, dıyo aşış bibu çəmə navədə?»

¹² Yunisi votışe bəvon: «Mını peqətən şodən bə dıyo, bəvədə dıyo aşış bəbe şımə navədə, çumçıko zıneydəm, ın yolə kulok bino be bəçımıro».

¹³ Əmma qəmivonon dilisıxtə dəmandin bo çəp kəşe ki, qəmi ton bıstəni bə hışki, əmma nıznəşone. Çumçıko dıyo şe-şe bə cuş omeydəbe bəçəvon vəynə. ¹⁴ Bəvədə əvon fəryod karde-karde votışone bə Rəbbi: «Ya Rəbb, bə lovəmon Bətı, mahaşt ğır bıbəmon çı odəmi hıubətədə. Nımandı çəmə səpe beqınəə xun!

Çumçıko Tı, Ya Rəbb, kardə ıştə piyəy».

¹⁵ Əvon peqətişone şodoşone Yunisi bə dıyo, kulok hite dıyoədə. ¹⁶ Bəvədə odəmon bərk tarsəyn Rəbbiku iyən ğırbon edaşte-edaşte əhd kardışone bə Rəbbi. ¹⁷ Rəbbi rosnişe qıləy yolə moy bo Yunisi ebarde iyən Yunis se ruj-se şəv mande moy ləvədə.

2

Yunisi tobə iyən xılos

¹ Yunisi moy ləvəo dıvo kardışe bəştə Xıdo Rəbbi, votışe:

² «Əzobi dilədə sədo kardıme Rəbb,
Əy cəvob doşe bəmı.

Fəryod kardıme çe mardon məholo,

Tı məsəy çımı sədo.

³ Tı şodoy mını bə niğili, bə dıyo vənqo,

Ovəyzon dəqətışone mı,

Iştı həmə ləpon iyən dalğon

Dəvardin çımı səpe.

⁴ Az votıme: “Tojniyə bim iştı çəşon vəo”,

Əmma ijən bəvındem Iştı niğəddəsə məbədi.

⁵ Ovon dəqətışone mı tosə çımı nəfəsi bırıye,

Niğiliyon səşone mı,

Kəzon pepuşiyəyn bəçımı səy.

⁶ Eşim tosə bandon bını,

Əbədi vi be dıyo çımı dumo,

Ha çımı Rəbbə Xıdo, əmma Tı bekarde çımı con niğilə coləo.

⁷ Qətıme dim bə Rəbbi, çımı con pesiyədə dılətonədə

Çımı dıvo rəsəy Bəti,

Bəştı niğəddəsə məbədi.

⁸ Bə puçə bıton səcdə kardəkəson

İmtino bəkarden bəvon doə bıə lutfiku.

⁹ Əmma az de şukuri nəğmə, ğırbon bəvam Bəti

Bə vırə bərosnem iştə əhdi.

Xılos Rəbbədəy!»

¹⁰ Rəbbi əmr kardışe bə moy iyən moy oqordınışe Yunis iştə qəvo bə hıški.

3

Yunis şeydə bə Ninevə

¹ Rəbbi sıxan dıminə kərə nozil be bə Yunisi: ² «Bəşt, bışi bə Ninevə - bə yolə şəhr iyən car bıkəş bəvon Çımı bəti votə sıxanon». ³ Yunis bə Rəbbi sıxani xoto əşte, şe bə Ninevə. Ninevə yolə şəhrbe çe Xıdo nəzərədə. Bə se ruj nəve əbi əvrəy. ⁴ Yunis dəmande şəhrədə nəve, şe irujnə ro iyən votışe car kəşe-kəşe: «Ninevə vilo bəbe çil ruji bəpeştə!» ⁵ Ninevəvijon bovə kardışone

bə Xıdo, elon kardışone rujə, yolu-ruk həmməy tankardışone cıl.
⁶ In xəbə rəseədə bə Ninevə podşo, əv əşte ıştə taxto, evatışe ıştə tano podşo libos, tankardışe cıl, nışte xoki səpe. ⁷ Podşo hamyəşe ıştə iyən çe əyonon nomo ki, Ninevədə elon bıkən bıvotın: «Hiçi nəhən, bə kəfşən nışun iyən ov penışomın nə insonon, nə həyvnonon, nə mol-mələ, nəən ki pəson-bızon. ⁸ Cıl tan bıkən insononən, həyvnononən iyən dilisıxt fəryod bıkən bə Xıdo. Har kəs oqardı ıştə yavə roo iyən ıştə daston zoriku. ⁹ Ki zıneydə, ğavər Xıdo bə rəhm bome, bəqordıne çəməku ıştə qılə ğəzəbi, məhv əbınimon əmə».

¹⁰ Xıdo vındışe çəvon koon, çəvon yavə royku oqarde. Əve bə rəhm oməy, nıvğandışe sıftəku bəçəvon səpe vığande piyə bəlo.

4

Yunisi ğıyz iyən çe Xıdo lutf

¹ In ko hiç xoş noməy bə Yunisi, əv ğıyzin be. ² Əy dıvo kardekarde votışe bə Rəbbi: «Ya Rəbb! Az hələ ıştə məmləkətədə beədə imi voteydənıbım? Bı səbəb az vitim bə Tarşış, çumçıko zıneydəbım, Tı lutfkorə, rəhminə, behəddə səbrinə, bolə mehıbbətınə Xıdoş, rəhm bəkardeş, bəlo nibəvğandes! ³ Ha Rəbba, esət isə, bə lovəm, bıstən çımı conı, çumçıko bomı marde çoke mandesə». ⁴ Rəbbi votışe: «Çokə koye ıştı ğıyzin be?» ⁵ Yunis beşe şəhəro, nışte şəhəri həşibeşə tərəfədə. Əyo jəşe boştə ləm, nışte çəy soqnədə ki, bıvındı şəhərədə bıə ğəziyon. ⁶ Rəbbə Xıdo vığandışe qıləy təğ ki, rost bıbu bo Yunisi səpe soqnə eğande iyən əy bevəcə holo peroxniye. Yunis xəyli şo be bı təğiro. ⁷ Əmma maşkinəy çəsonı Xıdo rosnişe qıləy rəsə melı. Melı dılətono hardışe rəsə, əv hışk be. ⁸ Həşi beşədə Xıdo rosnişe qemij. Həşi pesutışe çəy sə, əv incori qınıye, boştə marde piye-piye votışe: «Bomı marde çoke mandesə». ⁹ Xıdo votışe bə Yunisi: «Bəqəm çokə koye ıştı bı rəsəyro ğıyzin be?» Əy votışe: «Həlbəttə, çoke, jıqo ğıyzin bim ki, kam mande bıvardım».

¹⁰ Bəvədə Rəbbi votışe: «İştı dılı suteydə bə zəhməti nıkəşə iyən penırosniyə, i şəvədə bemə iyən i şəvədə məhv bıə rəsə. ¹¹ Bəs

Çımı dıl çoknə nısutı bo dıjdə şəhər Ninevə, əyo jiyə ıştə rostə
dasti çəpə dastiku co karde nıznə sadı vist həzosə vey insoni iyən
çandə həyvoni?»